

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**Rješenje**  
**po Prijavi koncentracije između privrednih subjekata „BINGO“ d.o.o. export-import Tuzla i**  
**„Ingram“ d.d. Srebrenik**

**Sarajevo,**  
**august, 2018. godine**



Broj: UP-04-26-1-015-9/18  
Sarajevo, 8.8.2018.godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16. i 18. Zakona o konkurenciji („Službeni glasnik BiH“, broj 48/05, 76/07 i 80/09), rješavajući po Prijavi koncentracije podnesene od strane privrednog subjekta „BINGO“ d.o.o. export-import Tuzla, u ul. Bosanska poljana bb, 75000 Tuzla, zaprimljenoj dana 4.6.2018. godine, pod brojem: UP-04-26-1-015-1/18 na 34. sjednici održanoj dana 8.8.2018.godine, donijelo je

### **R J E Š E N J E**

1. Ocjenjuje se dopuštenom koncentracija koja nastaje na relevantnom tržištu proizvodnje i veleprodaje kamena, kreča, betona i kamena eruptivca na području cijele Bosne i Hercegovine, kojom privredni subjekt „BINGO“ d.o.o. export-import Tuzla, stiče <sup>1</sup>(..)\*\*% vlasništva u privrednom subjektu „Ingram“ d.d. Srebrenik, kupovinom dionica.
2. Ovo Rješenje je konačno i upisuje se u registar koncentracija.
3. Ovo Rješenje će biti objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 4.6.2018. godine pod brojem: UP-04-26-1-015-1/18 zaprimilo, Prijavu koncentracije (dalje u tekstu: Prijava), podnesenu od strane privrednog subjekta „BINGO“ d.o.o. export-import Tuzla, u ul. Bosanska poljana bb, 75000 Tuzla (dalje u tekstu: Bingo ili Podnosilac prijave), koja se odnosi na sticanje (..)\*\*% udjela u osnovnom kapitalu privrednog subjekta „Ingram“ d.d. Srebrenik, ul. Industrijska bb, 75350 Srebrenik (dalje u tekstu: Ingram) kupovinom dionica.

Prijavu je, kao zastupnik privrednog subjekta Bingo, podnijela advokat Dina Duraković iz Advokatskog društva dmb legal d.o.o. Sarajevo, Kralja Tvrtka 6, 71000 Sarajevo (dalje u tekstu: Podnosilac prijave).

Uvidom u podnesenu Prijavu, Konkurencijsko vijeće je ustanovilo da ista nije uredna i kompletna u smislu odredbi Zakona o konkurenciji („Službeni glasnik BiH“, br. 48/05, 76/07 i 80/09) (dalje u tekstu: Zakon) i Odluke o načinu podnošenja prijave i kriterija za ocjenu koncentracija privrednih subjekata („Službeni glasnik BiH“, broj 34/10).

Dopuna Prijave, odnosno ispravka greške u samoj Prijavi zaprimljena je dana 27.6.2018. godine pod brojem: UP-04-26-1-015-5/18, te dopuna Prijave u formi pojašnjenja pod brojem: UP-04-26-1-015-6/18 od 6.7.2018.godine.

Konkurencijsko vijeće je dana 27.6.2018. godine pod brojem UP-04-26-1-015-4/18, objavilo Obavijest o prijavi predmetne koncentracije u dnevnom listu Oslobođenje d.o.o. Sarajevo, te na web stranici

---

<sup>1</sup>(..)\*\* podatak predstavlja poslovnu tajnu

Konkurencijskog vijeća i pozvalo sve zainteresirane strane na dostavljanje eventualnih primjedbi na istu, što se u predviđenom roku nije desilo.

Podnosilac prijave je naveo, u smislu člana 30. stav (2) Zakona, da nema namjeru podnošenja prijave predmetne koncentracije drugim tijelima nadležnim za ocjenu iste, izvan teritorije Bosne i Hercegovine.

Nakon analize podnesene Prijave i zaprimljenih dopuna, Konkurencijsko vijeće je dana 2.8.2018. godine, pod brojem: UP-04-26-1-015-7/18, Podnosiocu prijave izdalo Potvrdu o prijemu kompletne i uredne prijave koncentracije, u smislu člana 30. stav (3) Zakona.

Prijava namjere koncentracije je podnesena u smislu člana 16. stav (1) Zakona.

## 1. Učesnici predmetne koncentracije

Učesnici koncentracije po predmetnoj prijavi su privredni subjekt „BINGO“ d.o.o. export-import Tuzla i privredni subjekt “Ingram ” d.d. Srebrenik.

### 1.1 Privredni subjekt „BINGO“ d.o.o. export-import Tuzla, kao kupac

Privredni subjekt „BINGO“ d.o.o. export-import Tuzla, sa sjedištem u ul. Bosanska poljana bb, 75000 Tuzla, registrovan je u Općinskom sudu u Tuzli s matičnim brojem 1-5356 i upisanim kapitalom u iznosu od (..)\*\*KM.

Prema aktuelnom izvodu iz sudskog registra, 100% vlasnik privrednog subjekta Bingo je fizičko lice (..)\*\*.

Osnovna poslovna djelatnost privrednog subjekta Bingo jeste trgovina na malo prehrambenim proizvodima i robom široke potrošnje, (47.11 - šifra djelatnosti prema klasifikaciji u skladu sa Obavještenjem o razvrstavanju pravnog lica prema klasifikaciji djelatnosti KD BiH 2010), koju obavlja u (..)\*\* objekata koji se nalaze na cijeloj teritoriji Bosne i Hercegovine.

Pored osnovne poslovne djelatnosti privredni subjekt Bingo isključivo u svojim objektima obavlja i poslove zastupništva robne marke S`Oliver, poslove ugostiteljstva, mjenjačke poslove u saradnji sa bankom, iznajmljivanja poslovnih prostora, te je od 2014. godine započeo djelatnost proizvodnje konzumnih jaja, brojlera, papirne galanterije, tjestenine i začina.

#### 1.1.1 Povezana društva podnosioca prijave

Direktno povezana društva odnosno privredni subjekti u kojima podnosilac prijave ima većinski udio u vlasništvu su sljedeća:

Tabela 1.

R.br	Naziv povezanog društva	Vlasnički udio u %	Osnovna djelatnost
1.	(..)**	(..)**	31.09 - proizvodnja ostalog namještaja
2.	(..)**	(..)**	68.10 - kupovina i prodaja vlastitih nekretnina
3.	(..)**	(..)**	20.41 - proizvodnja sapuna i deterdženata
4.	(..)**	(..)**	45.20 - održavanje i popravka motornih vozila
5.	(..)**	(..)**	68.20 - Iznajmljivanje i upravljanje nekretnin.
6.	(..)**	(..)**	68.20 - Iznajmljivanje i upravljanje nekretnin.
7.	(..)**	(..)**	68.10 - kupovina i prodaja vlastitih nekretnina
8.	(..)**	(..)**	68.20 - Iznajmljivanje i upravljanje nekretnin.
9.	(..)**	(..)**	14.13 - proizvodnja ostale vanjske odjeće
10.	(..)**	(..)**	49.41 - Cestovni prijevoz robe
11.	(..)**	(..)**	11.07 - Proizvodnja osvjež. pića, mineralne vode

12.	(..)**	(..)**	10.71 - Proizvodnja hljeba, peciva i kolača
13.	(..)**	(..)**	46.90 - Nespecijalizirana trgovina na veliko
14.	(..)**	(..)**	49.41 - Cestovni prijevoz robe

Izvor: Podaci iz prijave

Podnosilac prijave u istoj navodi da se niti jedno od povezanih društava ne bavi osnovnom djelatnošću koju obavlja sam podnosilac, niti ciljano društvo predmetne koncentracije.

## 1.2 Privredni subjekt „Ingram“ d.d. Srebrenik, kao ciljno društvo

Privredni subjekt „Ingram“ d.d. Srebrenik, ul. Industrijska bb, 75350 Srebrenik, upisan je u sudski registar Općinskog suda u Tuzli, sa matičnim brojem 1-15 i upisanim kapitalom u iznosu od (..)\*\*KM. Ovaj privredni subjekt je u vlasništvu dioničara prema listi Komisije za vrijednosne papire, gdje su na dan 31.12.2017.godine evidentirani najveći udjeli sljedećih dioničara: (..)\*\* i ostali dioničari sa udjelom manjim od 2%.

Osnovna registrovana djelatnost privrednog subjekta Ingram jeste proizvodnja kamena i kamenih agregata (08.11 - šifra djelatnosti prema klasifikaciji djelatnosti KD BiH 2010).

### 1.2.1 Povezani privredni subjekti ciljnog društva

Privredni subjekt Ingram posjeduje (..)\*\* % kapitala u privrednom subjektu Tehnološki centar „E&P“ doo Zavidovići, Mala Ribnica bb, 72220 Zavidovići, čija je osnovna djelatnost vađenje gline i kaolina (08.12-šifra djelatnosti prema klasifikaciji djelatnosti KD BiH 2010), upisanom u registar privrednih subjekata kod Općinskog suda u Tuzli pod matičnim brojem 43-01-0479-09.

## 2. Obaveza prijave koncentracije

Na osnovu člana 14. stav (1) Zakona, namjeravanu koncentraciju učesnici su u obavezi prijaviti ukoliko:

- ukupni godišnji prihod svih učesnika koncentracije ostvaren prodajom roba/usluga na svjetskom tržištu iznosi 100.000.000,00 KM po završnom računu iz godine koja je prethodila koncentraciji, i
- da ukupni godišnji prihod svakog od najmanje dva učesnika koncentracije ostvaren prodajom roba/usluga na tržištu Bosne i Hercegovine iznosi najmanje 8.000.000,00 KM u godini koja je prethodila koncentraciji, ili ukoliko je njihovo zajedničko tržišno učešće na relevantnom tržištu veće od 40%.

Ukupni godišnji prihodi privrednih subjekata učesnika predmetne koncentracije na dan 31. decembar 2017. godine iznosio je:

Tabela 2.

Red. br.	Naziv privrednog subjekta	Prihod ostvaren na tržištu u BiH izražen u KM	Prihod na svjetskom tržištu izražen u KM
01.	Bingo d.o.o. Tuzla	(..)**	(..)**
02.	Ingram d.d. Srebrenik	(..)**	(..)**

Izvor: podaci iz Prijave

Prema prikazanim podacima iz Tabele 2., finansijski pragovi odnosno uslovi predviđeni članom 14. stav (1) tačka b) Zakona, pod kojim postoji obaveza prijave koncentracije, su ispunjeni, te je postojala obaveza prijave koncentracije u roku od 15 dana od dana zaključivanja sporazuma, objavljivanja javne ponude dionica ili sticanja kontrole, zavisno od toga šta nastupi ranije.

### **3. Pravni osnov i oblik koncentracije**

U podnesenoj Prijavi, podnosilac prijave kao pravni osnov predmetne koncentracije navodi Potvrdu registra vrijednosnih papira u Federaciji Bosne i Hercegovine broj: (...)\*\*od dana 1.6.2018. godine.

Naime, podnosilac prijave je dana 21.5.2018. godine putem brokerske kuće AW Broker doo Sarajevo, kupio dionice privrednog subjekta Ingram, a što je upisano u Registar vrijednosnih papira Federacije Bosne i Hercegovine. Kao dokaz kupovine predmetnih dionica Podnosiocu prijave dana 1.6.2018. godine, izdata je Potvrda Registra vrijednosnih papira u Federaciji Bosne i Hercegovine pod brojem: (...)\*\*, iz koje nesporno proizilazi da je Podnosilac prijave kupio (...)\*\* dionice privrednog subjekta Ingram, čija nominalna vrijednost ukupno iznosi (...)\*\* KM, što predstavlja (...)\*\* % udjela u vlasništvu ciljnog društva.

Koncentracija se dakle odnosi na sticanje (...)\*\* % vlasništva i sticanje kontrole nad privrednim subjektom Ingram od strane privrednog subjekta Bingo.

Slijedom navedenog, pravni oblik predmetne koncentracije jeste sticanje kontrole nad privrednim subjektom, kupovinom većine dionica, u smislu odredbi člana 12. stav (1) tačka b) pod 1) Zakona.

Analizom dostavljene dokumentacije, Konkurencijsko vijeće je ustanovilo da je obaveza prijave predmetne koncentracije, u skladu s članom 16. stav (1) Zakona, postojala u rasponu od 15 dana počev od dana objavljivanja javne ponude dionica ili sticanja kontrole, zavisno od toga šta nastupi ranije, što je od strane Podnosioca prijave ispoštovano, odnosno Prijava dostavljena u propisanom roku.

### **4. Pravni okvir ocjene koncentracije**

Konkurencijsko vijeće u postupku ocjene koncentracije je primijenilo odredbe Zakona, Odluke o utvrđivanju relevantnog tržišta («Službeni glasnik BiH», br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 30/10).

Konkurencijsko vijeće, na osnovu člana 43. stav (7) Zakona, također je koristilo kriterije i standarde iz Obavijesti Evropske komisije o izračunu ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

### **5. Relevantno tržište koncentracije**

Relevantno tržište, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda i/ili usluga koji su predmet obavljanja djelatnosti na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge, koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Kao relevantni proizvod određuje se proizvodnja i veleprodaja kamena, kreča, betona i kamena eruptivca.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda i/ili usluge pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Kao geografsko tržište određuje se područje cijele Bosne i Hercegovine, uzimajući u obzir područje ciljnog društva, odnosno privrednog subjekta Ingram, kao društva nad kojim se stiče kontrola predmetnom koncentracijom.

U skladu sa članom 3. Zakona, te čl. 4. i 5. Odluke o utvrđivanju relevantnog tržišta, relevantnim tržištem predmetne koncentracije smatra se tržište proizvodnje i veleprodaje kamena, kreča, betona i kamena eruptivca na cijeloj teritoriji Bosne i Hercegovine.

## 6. Analiza relevantnog tržišta i tržišnog učešća

Podnosilac prijave dostavio je Konkurencijskom vijeću procjenu tržišnih udjela učesnika koncentracije i njihovih konkurenata na relevantnom tržištu u 2017. godini, i to na osnovu podataka o proizvodnim kapacitetima konkurenata, pri tome uzimajući u obzir i geografski položaj konkurenata, pretpostavku o obimu plasiranih proizvoda, potražnji i ponudi, kao i druge faktore:

### 6.1 Tržište proizvodnje i veleprodaje kreča u Bosni i Hercegovini:

Tabela 3.

Red. br.	Naziv privrednog subjekta	Kapacitet	Proizvodnja u tona/dan	Tržišno učešće %
<b>01.</b>	<b>Ingram d.d. Srebrenik</b>	(..)**	(..)**	(..)**
02.	Carmeus a.d. Doboj	(..)**	(..)**	(..)**
03.	Tvornica vapna doo Kreševo	(..)**	(..)**	(..)**
04.	Ravnaja a.d. Mali Zvornik	(..)**	(..)**	(..)**
05.	Hidrat a.d. Čelinac	(..)**	(..)**	(..)**
06.	Tvornica vapna Sirač a.d.	(..)**	(..)**	(..)**
07.	GIRK Kalun a.d. Drniš	(..)**	(..)**	(..)**
	<b>Ukupno:</b>			<b>100,0</b>

Izvor: podaci iz Prijave

Prema podacima iz tabele 3. vidljivo je da ciljno društvo na relevantnom tržištu ima procijenjeni tržišni udio od (..)\*\* %, dok je tržišni udio vodećeg konkurenta procijenjen na (..)\*\* %, a učešće ostalih učesnika na relevantnom tržištu kreće se u rasponu od 2 - 21%.

### 6.2 Tržište proizvodnje i veleprodaje kamena u Bosni i Hercegovini:

Tabela 4.

Red. br.	Naziv privrednog subjekta	Proizvodnja u tonama	Tržišno učešće %
<b>01.</b>	<b>Ingram d.d. Srebrenik</b>	(..)**	(..)**
02.	Rudnik krečnjaka Vijenac, Lukavac	(..)**	(..)**
03.	JATA group doo Srebrenik	(..)**	(..)**
04.	Jablan doo Srebrenik	(..)**	(..)**
05.	Terakop doo Živinice	(..)**	(..)**
06.	Gramat doo Gračanica	(..)**	(..)**
	<b>Ukupno:</b>		<b>100,0</b>

Izvor: podaci iz Prijave

Prema podacima iz Tabele 4. vidljivo je da ciljno društvo na relevantnom tržištu ima procijenjeni tržišni udio od (..)\*\* %, dok je tržišni udio vodećeg konkurenta procijenjen na (..)\*\*%, a učešće ostalih učesnika na relevantnom tržištu kreće u rasponu od 3 - 7%.

### 6.3 Tržište proizvodnje i veleprodaje betona u Bosni i Hercegovini:

Tabela 5.

Red. br.	Naziv privrednog subjekta	Proizvodnja u m3/h	Tržišno učešće %
01.	Ingram d.d. Srebrenik	(..)**	(..)**
02.	ITK Musić doo Srebrenik, betonara	(..)**	(..)**
03.	Gromex doo Srebrenik, betonara	(..)**	(..)**
04.	Beton Company doo Brčko, betonara	(..)**	(..)**
05.	A3 Beton doo Živinice, betonara	(..)**	(..)**
06.	Gramat doo Gračanica, betonara	(..)**	(..)**
07.	Boskom doo Gračanica, betonara	(..)**	(..)**
08.	TBG doo Lukavac, betonara	(..)**	(..)**
09.	NEXE BiH doo Sarajevo, betonska baza Tuzla	(..)**	(..)**
	<b>Ukupno:</b>		<b>100,0</b>

Izvor: podaci iz Prijave

Prema podacima iz tabele 4. može se vidjeti da ciljno društvo na relevantnom tržištu ima procijenjeni tržišni udio od (..)\*\* %, dok se učešće ostalih učesnika na relevantnom tržištu kreće u rasponu od 5 - 20%, te da na predmetnom tržištu niti jedan od učesnika nema lidersku poziciju.

### 6.4 Tržište proizvodnje i veleprodaje kamena eruptivca u Bosni i Hercegovini:

Tabela 6.

Red. br.	Naziv privrednog subjekta	Proizvodnja u tonama	Tržišno učešće %
01.	Plantras doo Banovići	(..)**	(..)**
02.	<b>E&amp;P tehnološki centar doo Zavidovići</b>	(..)**	(..)**
03.	Geokop doo Derventa	(..)**	(..)**
04.	Operta BBM GmbH doo Sarajevo	(..)**	(..)**
05.	Ograjina doo Žepče	(..)**	(..)**
	<b>Ukupno:</b>		<b>100,0</b>

Izvor: podaci iz Prijave

Prema podacima prikazanim u Tabeli 6., vidljivo je da povezano društvo ciljnog društva predmetne koncentracije na ovom tržištu ima učešće od (..)\*\*%, vodeći konkurent ima učešće od (..)\*\*%, a ostali učesnici (..)\*\* % učešća.

## 7. Ocjena predmetne koncentracije

Na osnovu kriterija utvrđenih članom 17. Zakona, Konkurencijsko vijeće je ocijenilo efekte predmetne koncentracije, analiziralo uticaje istih na strukturu relevantnog tržišta kao i da li će predmetna koncentracija stvoriti dominantan položaj Podnosioca prijave, koji bi za posljedicu imao značajno narušavanje efikasne tržišne konkurencije, u smislu člana 13. Zakona o konkurenciji, odnosno da li će ista proizvesti pozitivne efekte koji se ogledaju u jačanju postojeće konkurencije na relevantnom tržištu.

Konkurencijsko vijeće je u toku razmatranja predmetne koncentracije prikupilo potrebne podatke od podnosioca prijave, te na osnovu istih procijenilo da na relevantnom tržištu postoji značajan broj konkurenata što je pretpostavka djelovanja slobodne konkurencije, te analizom relevantnog tržišta u smislu člana 17. Zakona, ocijenilo da ne postoje pravne i druge zapreke za ulazak drugih privrednih subjekata na relevantno tržište.

Također je utvrđeno da Podnosilac predmetne prijave niti jedno od njegovih povezanih društava, ne djeluje na tržištu na kom ciljno društvo obavlja svoju osnovnu djelatnost, što znači da bi nakon provođenja

predmetne koncentracije stanje na relevantnom tržištu ostalo nepromjenjeno, odnosno provođenjem iste neće doći do isključenja konkurencije niti do eventualnog slabljenja funkcionisanja slobodne tržišne konkurencije na predmetnom relevantnom tržištu, odnosno da predmetna koncentracija ne sprječava, ograničava niti narušava tržišnu konkurenciju na relevantnom tržištu.

Podnosilac prijave u istoj obrazlaže da namjerava sinergijom sa ciljnim društvom obezbijediti dostavu njihovih proizvoda svim zainteresiranim i potencijalnim kompanijama i time umanjiti troškove poslovanja, istovremeno unaprijediti i proširiti poslovanje grupacije, uložiti u mehanizaciju i time unaprijediti proces proizvodnje, te kroz politiku najpovoljnijih cijena i uslova, što većem broju potrošača omogućiti povoljniji način kupovine posebno domaćih proizvoda.

Na osnovu raspoloživih podataka, ocijenjeno je da učesnici koncentracije i njihova povezana društva, nakon provođenja koncentracije neće steći dominantan položaj na relevantnom tržištu, te se u tom smislu ne mogu dovesti u položaj da direktno ili indirektno nameću neloyalne kupovne ili prodajne cijene ili uslove poslovanja kojima se ograničava konkurencija na štetu potrošača.

Konkurencijsko vijeće je uzimajući u obzir iznesene činjenice i podatke, ocijenilo predmetnu koncentraciju dopuštenom, u smislu člana 18. stav (2) tačka a) Zakona te donijelo odluku kao u dispozitivu ovoga Rješenja.

## **8. Administrativna taksa**

Podnosilac prijave u skladu s članom 2. tarifni broj 107. stav (1) tačka d) pod 1) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06 i 18/11), dužan je platiti administrativnu taksu na ovo Rješenje u iznosu od 2.500,00 KM u korist Budžeta institucija Bosne i Hercegovine.

## **9. Pouka o pravnom lijeku**

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

**Predsjednica**

**Adisa Begić**